

Tí xroon ikjin ch'ín Pablo chr'énhen ch'án tí sín siín chjasin Filipos

Ch'ín Pablo ikjin xroon k'uáyéhe tí n̄nko chjasin Filipos

¹ Janhan Pablo la ko Timoteo ch'ezeni xra Jesucristo, mé ikjinni tí xroon i chr'anhánrá kaín tí jahará kichó ni tinkachónkirá Cristo Jesús tjejórá chjasin Filipos la ko tí sín t'etōan kuènte n̄nko ntiha.

² Tjanchiani kixin It'éni Dios la ko Ìnchéni Jesucristo kjuasáyé ch'án imá chrókjuincheyaonrá ch'án la ko chrók'uayéhérá kjuaxróxin.

Ch'ín Pablo tjechrónóhe ch'án Dios kixin tí sín tinkáchónki Jesús ntiha

³ A ntá tió xráxinkavan tí jahará la imá tjahā Dios kjuasáya

⁴ la ko níxjahā Dios la imá chàna tjánchāhā ch'án kixin tsjinkĩtsa ch'án kaín tí jahará.

⁵ Jahará la kjuínkĩtsará tió kjuàkua tí tan jína tí saoxín kuinhínrá itén Dios la naxā tjejotjínkĩtsará ijje.

⁶ Ó nòna chaxín kixin xikaha Dios ó kjuankixin ch'án ch'e ch'án xra jína kixin kuitekáonrá mé xikaha naxā tsjintaxín sich'e ch'án tsjixrakájia tí yaon tsokjan Jesucristo.

⁷ Jína kixin tjenkayáxian kuènte kaín tí jahará. Méxra xikaha imá tjuahárá. Jahará la ko janhan

la jnkokón kjuachaxin k'uáyéheni la kjónté janhan tjéchjina o itjén tí tjejó tí sín t'etoan tjéxrjanka kixin jína tí tan tsaáxinni.

⁸ Dios la ó nohe kixin imá tjínkavan chrók'uíquuan kaín tí jahará kixin éxí tjuàxinrá Cristo.

⁹ Tjáncháha Dios kixin tsjinkitsa ch'án tí jahará kixin antsí má chrótjuèhéra ch'án la ko chrók'uánkí tí kjuaxrexinkaon kuéntará kixin antsí chrókuiénxinrá kaín nkehe.

¹⁰ La ntá chrókónohará chrókuákjára tí nkehe jína. A ntá tí xikaha chrókjuich'erá la jína tjóá chrók'uejorá la ko kohya nkehe chrókjuanchia jie tió tsokjan Jesucristo.

¹¹ Méxra jahará chrókjuich'erá xra jína éxí ijnko nkehe jína chrók'óna kixin kjuasáyé Jesucristo la ntá xikaha la chrókjuíkosáyehéra Dios.

A ntá janhan la tjéchonxian Cristo

¹² Kichóni tjínkavan tsonohará kixin tí nkehe kjuasótexinna la kjuínkitsa kixin kuínhin chojni tí itén Dios tsaáxinni.

¹³ Kaínxín tí chojni siín palacio la ko kaín tí í so sín mé nohe sín kixin tjéchjinaxián kixin tinkachónkia Jesucristo.

¹⁴ A ntá tí tjéchjina la itsjé tí sín kichó ni antsí má kóxrjínhin sín tjako sín itén Inchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinoxínhin sín kixin tjinkaon sín chrókjuachaxinna sín. A ntá í so sín tjako itén ch'án kixin tjinkaon sín jína chrókjuinkitsana sín.

¹⁶ Kjánchó iso sín tjinkaon sín chrókjuako sín kixin chrókjuacha sín la ntá kénhya asén sín tjako sín. Mé

xíkaha ch'e sín kixin tjinkaon sín chrók'uekana sín antsí má jie kixin naxa tjéçhina.

¹⁷ La í so sín nixja sín kuente Cristo kixin tjuèhe sín ch'án la ko tjuana sín la ó nohe sín kixin ntihi tjén kixin tsoxrjanka tí itan tsaáxinni.

¹⁸ Kjánchó ántosenná kjónté á chaxín kaín asén sín tjako sín o náhí, la imá chàna kixin chrónka sín tí tan jína kuente Cristo la antsí má chéhe asenná.

¹⁹ Ó nòna janhan kixin kjónté kaín nkehe tsonna la kjónté xíkaha la tsaáxinna kixin kjuasáyará jahará tjejónixjehérá Dios la ko tí Nchakuen Jesu-cristo mé tjetjinkitsana.

²⁰ Jína tjéçonhan kixin Dios la tsítóehya tí janhan kixin ichrén nkehe jínahya chrókóna. Tjínkavan tsochonta kjuachaxin kixin jína tsonixja kaín asenná nkayakon chojni. Ntá xíkaha senó la xíkaha ijie tió ts'ikon chojni tí janhan la tsonoexín sín kixin Cristo imá chóna kjuachaxin kjónté á naxa tjéçuán o á ó tsík'ena.

²¹ Kixin janhan na Cristo tjéçonxian la ntá kjónté ts'énxian xíkaha la mé chrókjuácha.

²² A ntá tí naxa tsjak'é naxa tjéçuán ntá naxa jína sit'ahá Ìnchéni xra. Nonahya nkehe tí chrókuákjaá, á chrók'uén o á chrókjuak'éçuán.

²³ Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékian Cristo. A ntá janhan la ntáxrjan kixin íchá jína tíha.

²⁴ Kjánchó t'ichjánxin naxa chrókjuak'é kixin naxa chrókjuínkítsa tí jahará.

²⁵ Méxra ó nòna kixin naxa tsitona tí tjejorá kixin chrókjuínkítsa ti jahará kixin ntá antsí chrókónohará la chrókócháhará kixin jína

chrókuinkachónkirá Ìnchéni.

²⁶ Ntá tió tsjasán janhan ts'ejóni ínaá la imá tsocháhará la tsjanchehéra kjuasáyé Jesucristo.

²⁷ A ntá jahará chrókjuákoxinrá chrók'uejorá jína éxí ntáchro tí tan kjuakoxin Ìnchéni Cristo. Mé xikaha tí tsjasántsjahará o náhí la tjínkavan chrókuinhan kixin naxa imá tinkachónkirá Cristo la ko jnkokoá tjenkayáxinrá la ko jnkokoá tje-joch'erá xra tjàkorá tí itan jína tsaáxinni.

²⁸ Chrókuítóéhyará kixin tí sín nínkakonhanrá chrókjuintachrakonrá sín. Tí xikaha chróchrakonhyará la chrókónoexín sín kixin ts'itjáyan sín, a ntá chrókónoxín kixin jahará mé chaxín tsaára. Tíha mé Dios tsjinkítsará.

²⁹ Ó kuítóghanrá tí kjuachaxin kixin tsinkachónkirá Jesucristo la ko kjaxin kuítóghanrá kjuachaxin tsjasótiaxinrá kixin jahará mé tinkachónkirá ch'án.

³⁰ Jahará la ko janhan jnkokón ch'eni xra. Jahará ó k'uíkonrá senó nkexrí kjuít'a xra la ó kuínhínrá ijie kixin naxa tjét'a xra kjónté nínkakonna sín.

2

Kuítóhe Jesús tí kjuachaxin chrók'uetōan ch'án ntá ijie imá tjetoan ch'án

¹ Tí chaxín tí Cristo nchexraxinkaonrá la tí chaxín Cristo tjuàhará ch'án nchecháhará ch'án la tí chaxín tí Nchakuen ch'án xrikoára la tí chaxín nohará kixin tikonóahará ch'án

² la nchecháhará kixin jnkokoá chrók'uejokoará kíchuára la ko jnkokoá chrótjuèhéra kíchuára la

ko jnkokoá chrókjuenkayáxin nchakuanrá la ko jnkokoá xra chrókjuich'erá.

³ Chrókjuenkayáxinhyará chrókuétoanrá la ko chrókjuinchehnkehyará. Náhi. Chrók'ónará chojni t'etōanhya. Chrók'uikonrá éxi antsí tjetōan tí í so sín, a ntá kánhyó tjetōan tí jahará.

⁴ Ninkexró chrókjueyá tí nkehe kuènte jehó. Náhi. Chrókjuéyará tí nkehe chrókjuinkitsa tí í so chojni.

⁵ Jahará chrókjuenkayáxinrá éxi kjuenkayáxin Cristo Jesús.

⁶ Jehé ch'án chóna ch'án kaín kjuachaxin kuènte Dios la kjónté xikaha la tjinkakonhya ch'án chrókjuincheyóhe ch'án éxi Dios.

⁷ A ntá kuítóhe ch'án ntáha tí kjuachaxin k'uéchóna ch'án la k'óna ch'án ijnko chojni ntoa chjasintajni la ko kjuích'e ch'án xra.

⁸ La éxi ijnko chojni k'uētoanhya kjuák'e ch'án la kjuínchexiteyéhe ch'án Dios kaín asén ch'án kixin ik'uén ch'án, mé k'uénxin ch'án tí ntacruz.

⁹ Méxra Dios imá kjuikosáyehe tí jehé ch'án la ko kjuínchek'in ch'án ijnko ihnié imá tjetōan.

¹⁰ Kixin ntá tsinhin kaín chojni tí ihnié Jesús ntá ts'ejóxin toch'in sín, mé tí sín siín nkaya nkajni la ko ti sín siín chjasintajni la ko tí chojni siín chrínki nche.

¹¹ La ko kaín xín chojni tsochrónka sín kixin Jesu-cristo mé Ìnché sín mé xikaha tsjikosáyehe sín It'eni Dios.

Tí sín tinkáchónki Cristo tóyóhe éxi xrohi t'inkaséyanxín chjasintajni

12 Jahará kichó ni imá tjuahará la xráxín kjuinchexiteyànará tí k'uék'ejóni. A ntá ijie la chrókjuintexiteyànará kjónté ikjín tjén. Chrókuítóéhyará tí nkehe tsjanjon kjuachón la chrók'uayakonhénrá jnkójina

13 kixin Dios ntaxraxinkaonrá s̄ich'erá tí nkehe jina tjinkaon ch'án.

14 Kaín x̄r̄a ch'erá la chrókóninkákuénhyará kíchuará la ko chrókjóntahyará kíchuará

15 kixin tsokohya ninkexró tsontáchro kixin jahará la chontará jie. Kixin jahará la mé tí x̄jeen Dios chróchontahyará jie, la tjejórá tí siín tí sín jínahya tjasin jie. Na ntá jahará chrók'uinkaséyanxín tí jehe sín éxí tí konotsé t'inkaséyanxín tí chjasintajni sítié.

16 Méx̄r̄a jahará chrók'uayakonhénrá jina tí tan tjanjon kjuachón. Tí x̄ikaha chrókjuintexiteyará jnkójina ntá tió tsi Cristo tsöchéhe asenná kixin x̄ikaha x̄r̄a tjejóch'erá kixin ntá tsonòna kixin jehya ó chónkó kjuak'ékjit'a x̄r̄a.

17 Kjónté chrók'uénxian la éxí nkehe chrókjuanchatóxixínrá Dios chrók'uikonrá tí janhan. Mé x̄ikaha chrókjuintaxín tí nkehe chróchjehérá ch'án kixin tinkachónkirá ch'án, la ntá mé janhan mé tsöchàna la ko tjínkavan kixin kaín rá x̄ikaha chrók'uayéhérá kjuachéhe.

18 Méx̄r̄a chrókócháhará jahará kjaxin la chrók'uayéhérá éxí tí kjuachéhe chonta.

Ch'ín Timoteo la ko ch'ín Epafrodito

19 Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'ín Timoteo

tsjijitsjehe ch'án tí jahará kixin ntá tsochàna tsinhan nkexrí tjejorá.

20 Kohya í jnko nkexro chrókjuenkayáxin éxí tí janhan la ko chrókóxakonhen kixin jahará chrók'uejorá jína.

21 Kaín tí í so sín tjejá sín tí nkehe tóxrjínhin sín ó la jehya tí nkehe tóxrjínhin Jesucristo.

22 A ntá jahará ó nohará kixin ch'ín Timoteo ó kjuakoxin ch'án kixin jína asén ch'án kixin jehe ch'án kjuít'akian ch'án xra kjuakoni tí tan jína. Éxí ijnko xjanna xikaha kjuínkítsana ch'án.

23 Mé xikaha tjínkavan tsochr'an ch'án tsjijit-sjehe ch'án tí jahará tió tsonòna nkexrí tsji tí xra kuèntana.

24 La ko kjaxin chonhan kixin Ìnchéni tsjinkítsana kixin tjoka tsjasán kjaxinna.

25 A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehe ch'án mé jnkokoá ch'ekoni ch'án xra kjónté nínkakhenni chojni. Jahará k'uechr'anrá ch'án ntihi kixin jehe ch'án tsjinkítsana ch'án kaín nkehe tjínkavan.

26 Imá tóxakonhen ch'án tsjijitsjehe ch'án tí jahará kixin ó nohe ch'án kixin tsíkinhínrá kixin k'uéníhi ch'án.

27 Chaxín k'uéníhi ch'án ó mero chrók'uen ch'án, a ntá Dios kuikonóehé tí jehe ch'án kjánchó jehya jehó ch'án, kjaxin kuikonóana Dios tí janhan kixin kánhyó chrók'uavá.

28 Méxra tjínkavan tsochr'an ch'án kixin ó nòna kixin tsocháhará ts'ikonrá ch'án ínaá la ko xikaha janhan í kánhyó chrók'uavá.

29 Imá chrókócháhará chrókjuiji ch'án kixin jehe ch'án mé ijnko kichó ni tinkáchónki Ìnchéni la ko chrókjuikosáyehérá ch'án éxi chrókjuikosáyehérá kaín tí í so sín éxi jehe ch'án.

30 Jehe ch'án ó mero chrók'uenxín ch'án tí ch'ehe ch'án xra Cristo. Mé siín kjuaxikaon chrók'uenxín ch'án kixin jehe ch'án kjuínkĩtsana ch'án kixin jahará xitjahya ts'inkará tsjínkĩtsará tí janhan.

3

Tí nkehe chaxín sínkí

1 A ntá ijie, kichó ni, chrókócháhará kixin jahará la kuente Ìnchéni. A ntá tí janhan la xrahya tsokjatée tsokjian tí nkehe ó kjian kixin tíha la chrókjuinkĩtsa tí jahará.

2 Chróchontará cuidado ti sín ch'e jínahya éxi konja la tóchrít'o sín cuérpóé sín.

3 A ntá tí chojni chaxín chóna xroye la mé tí jeheni kixin jeheni chaxín xraxinkakonxíni Dios kjuachaxién Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpóéni chrókóchrínjinni.

4 A ntá janhan kjaxin jína chróntáxrjan kixin chrókóchrít'o tí cuérpóé chojni. Ninkexró antsí chróchóna kjuachaxin kixin chrókuitekaon tí nkehe a.

5 Janhan mé tsíkana xroye tí k'uéchonta ijní yaon la ko janhan mé tikiñixian tí sín israelita la tsík'axrjeníxinna tí sín tsík'axrjeníxin ch'ín Benjamín la kjaxin janhan mé hebreo la ko t'aná la

naná la hebreo sín. La ko janhan mé tinkachónkia tí ley éxí tinkáchónki tí sín fariseo.

⁶ A ntá imá k'uénínkakonhan k'uéchonkíha tí sín tinkáchónki Jesús la ko imá kjuintaxiteyáha tí ley la kohya ninkexró tsonáchro kíxin chaxínhya tíha.

⁷ Ntá kaín tíha la tí ósé k'uékjenkayáxian janhan kíxin sínkí tíha, a ntá ijie la tinkachónkia Cristo la ntá tí nkehe k'uékóxrjìnna k'uékjít'a la ntá jie la ninkehó sínkíhya.

⁸ La kjaxin kaín xín nkehe t'íkuan éxí chónkó tíha kíxin antsí má tjetoan tsochoxián Ìnchéni Jesu-cristo. Kaín kjuaxrexinkaon jínahya k'uéchonta la kjuintak'itjáyan kíxin ijie ó tinkachónkia Cristo la kaín xín tí nkehe k'uéchonta la t'íkuan éxí chjínínó ó kíxin ntá xíkaha jína chrókjuak'ékian Cristo.

⁹ Chrókóchàna kíxin jnkokoá chrók'uejókoni ch'án. Tjeyáhya kíxin tí ley chrókjuinxín ijieni tí chrókjuinchexiteyéheni. Náhí. Tinkachónkia Cristo la tsaáxinni kíxin Dios la tsjakjìn tí ijieni kíxin tinkáchónkini ch'án.

¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tió xechón ch'án la ko tjínkavan tsjasótexinna éxí kjuasóte ch'án la ko kjónté chrók'uénna éxí k'uénxin ch'án

¹¹ kíxin ntá tjínkavan tsjácha tsoxechónna ínaá.

Ch'ín Pablo tjinkaon chrókjuacha ch'án

¹² Ntáxrjanhya kíxin kjuácha kaín tíha la ko ntáxrjanhya kíxin imá ntoá tjén. Kjánchó janhan tjínkavan tsjácha kaín tíha kíxin Cristo Jesús mé kjueyána ch'án senó xíkaha.

13 Kíchóni, ntáxrjanhya kixin janhván kjuácha tíha. Náhi. Janhan mé ts'itjáyanna kaín xín tí nkehe ó kuitóhe senó la t'ichjánxin kaín asenná tjichráha tí nkehe naxa t'itjáyan tsjácha.

14 Kíxin xikaha ntá chrókjuácha chrók'uayáha kaín tí nkehe jína tsjanjon Dios. Jehé ch'án la sinchexiteyá kaín tíha kixin tinkachónkia Jesu-cristo.

15 Kaínni tí tinkáchónkini Jesús kaín asénni la méxra xikaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha.

16 A ntá t'ichjánxin chrók'uejóni éxí tí nkehe ó kjuachani.

17 Kíchóni, chrók'uejorá éxí kjuak'é janhan la ko chrótsjehérá nkexrí tjejó tí í so chojni tjejóch'e éxí kjuakoni kixin xikaha kjuakoharáni tí jahará.

18 Nchónhya xrjankaxián senó la ntá xrjanka inaá la imá tsjanka kixin síin nchónhya sín tjejó sín éxí nínnakonhen sín tí Cristo k'uénxin ntacruz.

19 Tí sín a mé ts'itjáyan sín. Tí dios kuènte sín la mé tí nkehe ntáchro asén sín ó la ko tjinkaon sín chrókjuinchehnkexín sín tí nkehe chrókósuèxin sín. Jehó tjenkayáxin sín tí nkehe síin chjasintajni ó.

20 A ntá jeheni kaín ni la mé chojni kuènte nkajní la tjejóchónhenni kixin ts'inkajinxin nkaya nkajní tí nkexro tsaáxinni, mé Ìnchéni Jesucristo.

21 Ntá jehé ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhé éxí tí cuerpo náxrjón chóna ch'án. Tíha mé tsoxiteyá kjuachaxién ch'án jíé kixin ó chóna ch'án kjuachaxin ts'etuèhen ch'án kaín xín nkehe.

4

Jnkochrínín chrókócháhará ḱixin tinkachónkirá Ìnchéni

¹ Jahará ḱíchó ni imá tjuahará la ko imá t́jínkavan chrókjuasántsjahará tí jahará ḱixin jahará imá nchechànará ḱixin jahará mé éxí ijnko nkehe ó kjuácha. Méxra j́ina chrók'uejorá chrókuinkachónkirá Ìnchéni ḱixin tjuahará ḱíchó ni.

² Xrjanóaha tjan Evodia la ko tjan Síntique ḱixin jnkokoá chrókjuenkayáxin sín ḱixin jehe sín la jnkokoá ḱíchó sín ḱixin tinkáchónki sín Ìnchéni.

³ Jaha la j́ina k'uéjóni kjuích'eni xra, méxra xrjanóaha t́jínkítsa tí sín chjin ḱíchó ni ḱixin jnkokoá chrókjuenkayáxin sín. Jehe sín kjáxin kjuích'e sín xra tíó kjuakoni tí tan j́ina tsaáxinni. Koí tí ch'ín Clemente la ko í so sín kjuích'ekoni xra. Tí ihnié sín la ó ts'ínixín ts'ínixín ihnié chojni tsaá.

⁴ Nchechéhérá asánrá jnkochrínín ḱixin tjejókoará Ìnchéni. Ínaá kjaṭee xrjanka nchechéhérá asánrá.

⁵ Kaín chojni chrókónohe ḱixin jahará la chojni j́inará. Chróxráxinkáonrá ḱixin í séhya tsokjan Ìnchéni.

⁶ Tóxakuanhyará ninkehó. Íchá j́ina chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjáxin chrókjuancheherá ch'án kjuasáya.

⁷ A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuènte ch'án ḱixin imá ijié tíha. Tí kjuaxróxin mé ts'ayakonhen asánrá la ko ts'ayakonhen

tí kjuaxrexinkaon kuèntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuanhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xíkaha tjenkayáxinrá kaín xín tí nkehe náxrjón la ko tí nkehe tóxrjínhin Dios.

⁹ Chrókjuiç'erá kaín tí nkehe kjuákohará la ko tí nkehe kuínhínrá xrjanka la ko tí nkehe kuétuanhánrá la ko tí nkehe k'uíkonrá kjuít'a, mé kaín tíha chrókjuiñchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkitsa sín tí ch'ín Pablo

¹⁰ Ìnchéni imá nchechàna kixin jahará xráxinkáonrá tí janhan ínaá. Ntáxrjanhya kixin tsík'itjáyanhanrá tí janhan kixin jahará xitjahya k'uékjínkítsará tí janhan.

¹¹ Jehya kixin ntáxrjan tíha kixin imá t'ichjánxinna kixin janhan na ó kuàna kjuaxróxin tjén kjónté tí nkehe chonta ó.

¹² Janhan ó kuàna tjén kjónté nóana la ko kjaxin ó kuàna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántosénna.

¹³ Kaín xra tsjácha sit'a kixin Cristo tsjinkitsana.

¹⁴ Kjánchó jahará jína kjuich'erá kixin kjuínkítsará kjuánjonrá nkehe t'ichjánxinna.

¹⁵ Tió sákjuíxian estado Macedonia la kjuankíxian kjuàkua tí tan tsaáxinni ínaá la jahórá tí

n̄inko chjasin Filipos ichr'anrá chichaon k'uayáha ḱixin cháhará kjuákohará itén Dios.

16 Kjaxin tió naxa kjuak'é chjasin Tesalónica la jahará ichr'anrá chichaon iso veces ḱixin kjuínkítsará tí nkehe k'uichjánxinna ntiha.

17 La jehya ḱixin tjínkavan ḱixin jehó nkehe chrók'uayáha. Náhi. Jehí tjínkavan ḱixin jahará antsí má chrókjuich'erá tí nkehe tjinkaon Dios ḱixin ntá antsí chrókjuachará.

18 Ó k'uayáha kaín nkehe tsíkjánjonrá la antsí itsjé chonta. Ó k'uayáha tí nkehe tsíchr'anrá mé tí nkehe kuikao ch'ín Epafrodito, la kaín tíha la ó tsjácha. Tíha la éxí yóhe ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjínhin ch'án.

19 Tí Dios kuéntana mé tsotjáhará kaín xín nkehe naxa t'itjáyan tsákjára ḱixin chóna ch'án kaín xín nkehe imá náxrjón tjete la tsjanjon ch'án ḱixin jahará la tinkachónkirá Cristo Jesús.

20 Kjuasáyé It'éni Dios jnkochŕixín. Mé xikaha tsoxiteyá. Amén.

Tsjixín nixja ch'ín Pablo

21 Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjehará sín.

22 Kjaxin kaín tí sín tinkáchónki Dios la ko tí sín ch'ehe xra tí ch'ín t'etōan romano mé nixjehará sín.

23 Tjáncháha ḱixin Ìnchéni Jesucristo mé chrókjuintayaonrá ch'án kaín rá. Amén. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
b9b09122-b3f6-59f0-9594-749907b32b5b